

Misericordeivels sco il Bab

Brev pastorala per la Cureisma 2016

da

msgr. dr. Vitus Huonder

Uestg da Cuera

*La brev pastorala ei da preleger en tuts survetschs divins l'emprema
dumengia da Cureisma, ils 14 da fevrer 2016.*

Ella sa vegnir publicada ella pressa naven dils 14 da fevrer 2016.

Cuera, ils 8 da december 2015

Fiasta dalla Immaculada concepziun da Maria

Frars e soras el Segner

Ils 8 da december 2015 ha Papa Francestg, ensemen cun tuts uestgs dil mund, aviert il Giubileum extraordinari dalla misericordia. Sco plaid empalont ha il Papa dau a nus in text ord igl evangeli tenor Lucas: Misericordeivels sco il Bab (cump. Lc 6,36)¹. Ella cardientscha ed entras la cardientscha astgein nus adina puspei sentir la misericordia divina. Nossa cardientscha ei ina unica e ferma expressiun dalla misericordia da Diu.

Quei plaid ord igl evangeli animescha nus da sez esser misericordeivels sco il Bab en tschiel ei misericordeivels. Nus duein buca mo vuler pretender misericordia. Nus duein era agir a moda misericordeivla enviers nos concarstgauns. Sco il Papa di, ei quei in “program da veta che pretenda bia, mo ch’ei era plein legria e pasch”². Entras mia brev pastoralala less jeu dar entgins impuls per quei program da veta.

¹*Misericordiae Vultus*. Bulla che annunzia il giubileum dalla misericordia extraordinari 14.

²*Misericordiae Vultus* 13.

Tgei ei misericordia?

Lein sedumandar tgei che misericordia munta atgnamein. Misericordia ei ina reacziun sin miseria e mal, sin nunpussonza e disdir. Sche nus schein che Dieus seigi misericordeivels, schein nus cheutras che Dieus percorscha la miseria ed il mal dil carstgaun e ch'el s'entaupa plein cumpassiun cun el en sia nunpussonza e siu disdir. Dieus fa persenn da quei che renda il carstgaun malventireivels. El vul liberar el da quei. Dieus surlai il carstgaun buc alla miseria ed al mal, buc alla nunpussonza ed al disdir. In exempel dat a nus la hodierna lecziun ord il tschunavel cudisch da Moses: "Cheu vein nus griu tier il Segner, il Diu da nos perdavons. Il Segner ha udiu nies clamar e viu nossa miseria, nossa stenta e nossa oppressiun. Ed il Segner ha menau nus cun maun ferm e bratsch stendiu ord l'Egipta" (Dt 26,7-8). Il Segner auda ed agescha. El liberescha il pievel ord la sclaveria. Quei ei in mussament da sia misericordia.

Era nus duein pia esser misericordeivels sco il Bab en tschiel. Nus duein imitar il Bab. Nus duein agir sco el agescha. Quei munta che nus ditgeien la miseria ed il mal da nies concarstgaun, scuntreien plein cumpassiun cun

sia nunpussonza e siu disdir e s'empatscheien dad el e seigien per el in agid en sias difficultads.

Tgei ei la fontauna dalla misericordia?

La fontauna dalla misericordia ei Dieus sez, siu agir grazius vid nus. Quei agir semuossa a moda concreta. Igl ei igl agir da Diu en Jesus Kristus. “Jesus Kristus ei la fatscha dalla misericordia dil Bab”³. La gronda ovra dalla misericordia dil Bab ei Jesus Kristus sez, sia incarnaziun, sia veta, sia ductrina, siu agir, siu murir per nus. La secunda lecziun dall'emprema dumengia da Cureisma animescha nus ord quei motiv da confessar Jesus Kristus: “Pertgei sche ti confessas cun tia bucca che Jesus ei il Signur e creias en tiu cor che Dieus ha leventau el dils morts, vegns ti a vegnir salvus” (Ro 10,9.11).

Sco fontauna ed origin dalla misericordia entupein nus Jesus a moda speciala egl evangeli dad oz. El cumbat cul giavel tacca il Segner il mal vid la ragisch e semuossa gest cheutras sco “fatscha dalla misericordia dil Bab”. Mirond sin el vegnin nus a retscheiver la forza e la grazia dad esser misericordeivels sco il Bab, oravontut da far

³ *Misericordiae Vultus* 1.

affrunt al mal en tuttas sias fuormas e dad esser per nies concarstgaun in ver agid per siu bien temporal e perpeten.

Co semuossa la misericordia?

La misericordia ha adina in cuntegn concret. Quel anflein nus cun numnar las schinumnadas ovras da misericordia. Ellas accumpognan nus a moda segira sin nossa via dalla veta ed el sedepurtar enviars nos concarstgauns. “Igl ei miu giavisch sincer ch’ils cristians fetschien lur patratgs sur dalla ovras corporalas e spirtalas da misericordia. Quei vegn ad esser ina fuorma da destadar nossa cunscienza ch’ei savens endurmentada e che vesa buca il drama dalla paupradad e da s’avanzar adina dapli el center dil cor digl evangeli, el qual ils paupers ein ils preferi dalla misericordia divina. L’annunziaziun da Jesus numna quella ovras da misericordia, per che nus saveien examinar nusezzi schebein nus vivin sco ses giuvnals ni buc”, aschia s’exprima Papa Francestg⁴.

⁴ *Misericordiae Vultus* 15.

Tgeininas ein las ovras da misericordia?

Bugen regordel jeu vid las ovras da misericordia. Las *ovras corporalas da misericordia* ein: Spistgentar quels che han fom, dar da beiber a quels che han seit, vestgir ils nius, dar albiert als jasters, visitar ils malsauns, visitar ils perschuniers, satrar ils morts. Ual aschia impurtontas ein las *ovras spiritualas da misericordia*: cussegliar endretg quels che han dubis, instruir ils ignorants, admonir ils pucconts, consolar ils cumbrigiain, perdunar offensiuns, supportar ils mulestus, urar tier Diu per vivs e morts.

Tgei ei prioritar?

Quei ch'ei prioritar pigl agir misericordeivel sedat adina neu dalla situaziun, ella quala nus stein ed ord ils problems, culs quals nus vegnin confruntai. Papa Francestg plaيدا en emprema lingua dils paupers ch'ei il preferi dalla misericordia divina⁵. Jeu vesel cheu buca mo la miseria materiala, mobein era la miseria spirituala e religiosa. Gest quella sto muentar nus, perquei che la miseria spirituala-psichica dil carstgaun ei bein la pli

⁵ Cump. *Misericordiae Vultus* 15.

gronda miseria. Per quei sto l'ovra da misericordia spirituala che animescha dad instruir ils ignorants, oravontut scher a cor a nus. Leutier s'auda il dar vinavon la cardientscha, enzatgei ch'ei zun urgent e che munta ina speciala sfida. Tier tuttas pusseivladads da semussar misericordeivels sco il Bab en tschiel, vegn in e scadina da nus anflar quei ch'el ni ella sa realisar.

Lein urar in per l'auter che quei Onn giubilar e quest temps da Cureisma dettien a nus in niev anim da secumprovar e da suandar Christus a moda verdeivla. La mumma dalla misericordia seigi per nus en quei grau in exempel singular ed ina speciala intercessura, damai ch'ella ha astgau regalar a nus Jesus Kristus, "la fatscha dalla misericordia dil Bab".

Bugen dun jeu a vus mia benedicziun episcopala e salidel da cor

+Vitus, uestg da Cuera